

Bringamosa

IN THE SPOTLIGHT!!!

POTRETNAN DI HENDE MUHER NOTABEL

NOMBER: Ruthy Vrieswijk-Bergen, naci na Aruba, 39 aña di edad, casa cu Johan Vrieswijk, mama di Jean-Louis di 16 aña y Renee di 18 aña.

EDUCACION: MAVO-4, 2 aña di HAVO-anochi y el a haci diferente sorto di curso-nan pa desaroya su mes entre otro riba tereno di medio.

MOTIBO: Nacemento di e C.D. "Cu amor por" cu su poesia, cu a wordo entrega oficialmente di 28 November 1996 na Minister Lily Beke-Martinez.

Despues di su HAVO-anochi el a cuminsa traha cu edad di 16 aña na Radio Kelkboom. Con bo ta mira bek ariba bo choice?

Ruthy: "Quizas e lo tabata mas mihor si mi a caba cu mi HAVO, pero e tempo ey caba mi curason tabata na radio".

Te cu 18 aña Ruthy a traha na radio, despues el a haya un puesto na banco. E tabata un puesto ariba e departamento di tene buki.

"Mi mester a sinta hopi, type y traha nota. Mi tabata tin masha poco contacto cu cliente y coleganan. Esey mi no a gusta y a dicidi pa tuma un puesto di telefonista na un di e hotelnan locual mi a gusta masha hopi mes, e contacto cu e hendenan", segun Ruthy.

Na aña 1977 el a casa y un aña despues el a duna luz na su prome yiu homber. El a combina su maternidad cu su otro afeccion grandi locual tabata su trabao na

radio.

Ruthy: "Mi tabata lesa entre otro e noticia pa Radio Carina. Mi no tabata autoriza pa forma e noticia, esey ta wordo haci pa mi. Esaki tin cu haber cu tabata tin un "stem nobo", mi tabata hopi jong y nan tabata haya cu mi no tabata tin suficiente experiencia, siendo cu mi a haya un bon training cerca Carlos Kelkboom. Den e tempo ey nos tabata yame Don Carlos".

Despues di un tempo Ruthy a haci su comeback na Radio Kelkboom cu e hobby-programma: "Dushi awacero Musical". Mientrastanto su di dos yiu homber a nace, Jean Louis. Asina mes Ruthy a haya tempo pa ademá di cuida su famia e por ta activo den Padvinderij, Womens-Club of Aruba y Easter Star.

Con Ruthy ta combina tur e actividnan aki cu e cuida di su famia? "Mi punto mas zwak ta cushina pero como famia nos ta sobrevivi perfectamente! Den weekend mi ta trata pa Padvinderij, na unda mi ta guia muchanan pa medio di weganan y storianan disciplina, respet propio y respet pa otro. Esey ta locual mi ta purba".

Kico e muchanan ta haya di e bida ocupa? (bay flauw di hari) "Nan ta kere cu mi ta loco! Manera varios bez ora cu mi a bisa algo na radio y mi no ta sigur di dje, mi sa puntra mi yiu mayor kico el a haya di dje. Anto e ta bisa mi: "Mammie, esey ta normal pa bo!"


Pero tin biaha ora bo ta hopi ocupa bo esposo y yiu na ta yama bo atencion. Ruthy: "Mi no tin problema cu esey pasobra mi famia semper lo ta na promer lugar. Y mas aleu bo lo mester papia cu otro, unda tin comunicacion bo ta yega hopi leu. Door cu mi a haya mi yiu na jong,



mi ta miranan mas como amigonan locual ta haci tur cos mas facil".

Con bo ta haya e posicion di hende muher na Aruba? Ruthy: "Mi semper ta masha orgulloso ora mi tende cu un muher Arubiano logra algo, por ehempel cu un muher a wordo nombra como Minister, of cu Aruba su prome "kroonverkenster" y piloto femenino. Pero tambe mi ta masha orguyoso cu mi mama a siña mi cu famia ta hopi importante".

Mientrastanto ta conoci cu e certamen di Miss Universo na 1997 lo no tuma lugar na Aruba, locual bo ta contento cu esey. "Mi ta haye un bon decision di gobierno. E certamen ta costa hopi placa y esey por wordo uza mas mihor, pa yuda financia schoolnan y instancianan cu ta duna contribucion na e desaroyo di nos comunidad. Fuera di esey mi ta haya e certamen di Miss malo door cu e ta duna hende muher y mucha muher un imagen exagera. Pa tene e discusion na bida mi sa haci e comparacion cu mercado di bes-



tia na unda bacanan ta wordo exhibi," Ruthy a bisa. Nos ta bay bek pa e motibo di nos combersacion, e nacemento di bo C.D. "Cu Amor Por", yen di poesia di bo man. "Mi ta skirbi for di mi 15 aña, esaki a wordo stimula door un di mi maestronan di HAVO-anochi. Probablemente el a wak cu skirbimento ta den mi. Mi semper a gusta comunica y poesia ta un forma di esey. E ta duna mi un sentimiento liber. Un di mi prome poesianan, erosa, ta

dedica na mi esposo. Y asina mi a sigui skirbi di tur sorto di cos di bida cu ta tene hende ocupa". Ruthy a haya apoyo di por ehempel Tierra del Sol, y e ganashi ta bay na bienestar di Scouting di Aruba. Na telefoon 33347, por haci pedido pa su C.D.: "Cu Amor Por". E poesia aki bao ta wordo encarga door di Ruthy Vrieswijk-Bergen como un mensahe di Pasco pa nos tur.

*"Oh, Dushi Paz di Pasco
Nos ta anhelabo asina tanto
Trece bendicion den tur famia
Pa un union yen di amor y harmonia
Laga bo luz eterno ilumina nos tur
Abo por yena nos cu gozo sigur
Laga nos sigui pordona y stima
Bo amor ta nos forza
Bo amor ta nos guia
Danki pa un otro dushi dia
Yen di alegria!!!*

Ruthy Cornelia Vrieswijk- Bergen.

ULTIMO NOTICIA!
Pronto Oficina di Asuntunan di Hend Muhe lo cuminsa cu un campaña di "Violencia contra hende muhe". Den nos siguiente edicion di Bringamosa lo por lesa mas tocante e campaña aki

